



PREDICTION
DE NOSTRADAMVS

SVR LA PERTE
DV CARDINAL MAZARIN
en France.

Extraite de la Centurie huitième, article neuf.

Voicy les termes de la Prediction.

*A soutenir la grand' Cape troublée,
Pour l'éclaircir les Rouges marcheront,
De mort famille sera presque troublée,
Les Rouges Rouges, le Rouge assommeront.*

INTERPRETATION.

MAIS pour en auoir la claire intelligence,
il faut prendre chaque vers de la Centu-
rie à part, commençant par le premier, auquel
le Mazarin est designé par *la grand' Cape trou-
blée*, & lequel porte en la qualité de Cardinal
vn long manteau de couleur rouge, qui luy

A

(S.L. 1640)

2
descend iusques au dessous des talons; mais avec tout cela, il n'est pas sans estre agité en son esprit, conformément à la prediction, qui dit qu'il est *troublé*.

Le second vers, nous fait voir que son trouble vient de ce que Nosseigneurs du Parlement designez par ce mot de *Rouges* (à cause de la longue robe rouge, dont ils sont affeublez) s'assemblent tous les iours, & depuis trois mois ils n'ont fait qu'aller & venir tant à sainct Germain en Laye, qu'au Palais Royal, pour descouvrir ses desseins & maluerfations de son Ministere: Car le Vers porte que *pour l'éclaircir ils marcheront*. Et de fait ils ont tant marché, qu'ils tiennent le Loup par l'oreille.

Le troisieme Vers nous represente qu'en suite de ce vn Conseiller, qui opinoit dans le Parlement, au sujet & en faueur dudit Mazarin, y est mort si soudainement, qu'vn chacun en a esté estonné, & sa famille toute *troublée*, comme porte le Vers.

Le dernier Vers menace d'vne Catastrophe estrange ledit Mazarin, lors qu'il l'aduertit que les *Rouges Rouges* duplicatiuement pris, *assommeront le Rouge*; c'est à dire, qu'infalliblement

443
ils le perdront. Et desia il est perdu d'honneur,
quand mesme il viuroit encore vn siecle.

Or ne s'en faut il pas estonner, pource que
comme Dieu a reuelé à ses Prophetes l'estat de
l'Eglise Militante, & tout ce qui luy doit arriuer
infalliblement iusques à la fin des siecles: Aussi
comme Gouverneur de l'Vniuers, il denonce à
l'auance & quand il luy plaist par ses seruiteurs
les desordres qui doiuent arriuer dans les Gou-
uernemens des Estats, dans les reuolutions &
changemens des Royaumes & des Empires,
aux fins de fermer la bouche aux Impies qui
osent dire: *Non videbit Dominus, nec intelliget
Deus Iacob.*

